

## Allannguutissatut siunnersuut

uunga

**UPA 2015/149: Siunnersuut uunga: Naalackersuinikkut sulinermut aningaasatigut tapiissuteqartarnek pillugu Inatsisartut inatsisaata allanngortinneqarneranik Inatsisartut inatsisaat nr. xx, uu. qqqq 2015-imeersoq**

(Partiinut nutaanut tunngaviusumik tapiissuteqartannginneq. Atuuffiit allat pillugit paasissutissiingikkaanni qinigaanermut tapiissutisisinnaannginneq. Partiit sinnerlugit aningaasartuutinik ilanngaassisinnaaneq)

Aappassaaneerinninnissamut Inatsisinut Ataatsimiititaliamit saqqummiunneqartoq.

## § 1-imut

**1. § 1, nr. 1, ima oqaasertaqassaaq:**

”**1. § 3-p** kingornanut ilanngunneqassaaq:

“**3a.** Naalackersuinikkut suliniaqatigiiffik, partii, Inatsisartunut qinersinermi kingullermi Inatsisartunut qinigassanngortinngitsoq qinigaatitaqanngitsorluunniit, kisiannili kingusinnerusukkut Inatsisartunut ilaasortap ataatsip ilaasortalluuniit arlallit sinniisuuffigissallugu nuuffigisaat, partiip Inatsisartuni naalackersuinikkut sulineranut tapiissutisisinnaatitaavoq. Tapiissut partiip ilaasortaataaanut ataasiakkaanut tamanut ukiumut 210.000 kr.-iuvoq.

*Imm. 2.* Imm. 1 malillugu tapiissutit ukiumi partiip sinniisuutitaqalernerani ukiumoortumik tapiissutit ilaattut, qaammatip partiip sinniisuutitaqalerfiata naanerani naatsorsorlugit, tunniunneqartassapput.

*Imm. 3.* Partiip sinniisaa § 4 malillugu, pineqartoq partiimut sinniisuuffigilikkaminut nuutsinnagu, attaviitsutut tapiissutisisimappat, qinikkamut pineqartumut partii qinigaatitamut tapiissutisisinnaanngilaq piffissamut sinniisuutitarilikkap § 4 malillugu tapiissutisiffigisimasaanut.””

**2. § 1, nr.2-mi §4a, imm.1, ima oqaasertaqassaaq:**

”§ 2 aamma 3a malillugit qinigaatitamut ataatsimut tapiissutit aamma § 4 malillugu tapiissutit qaammatinut ilivitsunut tamanut Inatsisartunut ilaasortap pineqartup atuuffimminik aningaasatigullu soqutigisaminik allanik paasissutissiisussaataitanerminik naammassinniffiginngisaanut tunniunneqartassanngillat.”

**3. § 1, nr. 2-p** kingornanut ilanngunneqassaaq:

”**01. § 5** ima oqaasertaqassaaq:

“**§ 5.** §§-it 2-4 malillugit tapiissutit qinnuteqareernikkut ukiumut ataasiarlutik

tunniunneqartarput, ukiup affaanut piffissanut 1. januarimiit 30. juunimut aamma 1. juulimiit 31. decembarimut atuuttussatut.

*Imm. 2. § 2, imm. 1 aamma 3, aamma § 3a malillugit tapiissutit ukiup affaanut siullermut naatsorsorneqartassapput ukiumi qinnuteqarfimmi 1. januarimi ilaasortaqaassuseq tunngavigalugu, ukiullu affaanut kingullermut naatsorsorneqartassallutik ukiumi qinnuteqarfimmi 1. julimi ilaasortaqaassuseq tunngavigalugu.*

*Imm. 3. Tapiissutit § 2, § 3a aamma § 4 malillugu partiimut, kattusseqatigiinnut ilaasortanulluunniit ataasiakkaanut ilaasortaajunnaartumulluunniit ukiup affaani qinersiviusumi tunniutassat ikilineqaratilluunniit amerlineqassanngillat, qinersineq 1. januarimut 1. julimulluunniit ilaasortat agguataarneqarnerannut sanilliullugu allannguuteqartitsisimagaluarpalluunniit.”*

**02. § 9, imm. 2, oqaaseqatigiit 3-4** ima oqaasertaqaassapput:

“Ukiup affaanut siullermut tapiissutit Inatsisartut Siulittaasoqarfiata tapiiffigineqarnissamik qinnuteqaat suliarereeraangagu tunniunneqartassapput. Ukiup affaanut kingullermut tapiissutit ukiumut siulianut naatsorsuutit kukkunersiukkat nassiuunneqareeraangata, siusinnerpaamilli 1, juli, tunniunneqartassapput.””

## **Allannguutissatut siunnersuummut nassuiaatit**

### **Nalinginnaasumik nassuiaatit**

Inatsisissatut siunnersuutaaqqaartumut sanilliullugu allannguutissatut siunnersuut allanngortitsinernik marlunnik malitseqassaaq:

1. Ilaasortaqaq Inatsisartuni parteerisaminit tunuarpat, ilaasortaqaq pineqartoq malittarisassat atuuttut malillugit attaviitsutut tapiissutisisinnaatitaavoq. Tamatuma kingorna ilaasortaqaq pineqartoq partiimik pilersitsippat imaluunniit partii Inatsisartuni ilaasortaataqariinngitsoq sinniisuuffigilerpagu, partii nutaaq taamatuttaaq pineqartumut qinigaatitamut tapiissutisisinnaatitaassaaq. Allannguutissatut siunnersuutip siunertaraa partiip qinigaatitanut tapiissutisisinnginnissaa piffissamut sinniiserisat attaviitsutut tapiissutisiffigisimasaannut.
2. Allannguutissatut siunnersuutikkut taamatuttaaq partiinut tapiissutit siunissami marlunnut avillugit 1. januar aamma 1. juli ilaasortaqaassuseq tunngavigalugu tunniunneqartalernissaannik Suleriaatsimut Ataatsimiititaliamit kaammattuut naammassineqarpoq. Malittarisassat atuuttut malillugit partiinut tapiissutit 1. januar ilaasortaqaassuseq tunngavigalugu tunniunneqartarput. Taamaalilluni ukiup ingerlanerani ilaasortaqaassuseq allanngorpat tamanna aatsaat ukiup tullianut partiimut tapiissutit annertussusiannut sunnuteqartarpoq. Allannguutissatut siunnersuut malillugu partiinut tapiissutit siunissami ukiup affakkaartumik tunniunneqartalissapput

1. januar aamma 1. juli ilaasortaqaassuseq tunngavigalugit. Ukiup affaata ingerlanerani ilaasortaqaassuseq allanngussagaluarpat, tamanna aatsaat ukiup affaanut tullermut partiimut tapiissutit annertussusiannut sunniuteqassaaq. Partiimut tapiissutit suli ukiumut ataasiaannarluni qinnuteqaatigineqartassapput.

Siunnersuummut tunuliaqutaasut sukumiinerusumik allaaserineqarnerat eqqarsaatigalugu Inatsisinut Ataatsimiititaliap isumaliutissiissutaa innersuussutigineqarpoq.

### **Aalajangersakkanut ataasiakkaanut nassuiaatit**

Nr. 1-imut.

Nalinginnaasumik nassuiaatini imm. 1 innersuussutigineqarpoq.

Nr. 2-mut.

Allannguutissatut siunnersuummi nr. 1-ip pisariaqartiligaanik aalajangersakkami paragrafinut innersuussinerit iluarsineqarnerat kisimi pineqarpoq.

Nr. 3-mut.

§ 5: Nalinginnaasumik nassuiaatini imm. 2 innersuussutigineqarpoq.

§ 9, imm. 2, oqaaseqatigiit 3-4: Allannguutissatut siunnersuummi nr. 3-p pisariaqartiligaanik iluarsineq pineqarpoq.